

AKASHVANI AIZAWL
REGIONAL NEWS BULLETIN

HEADLINES (EVENING)

- 1. Aizawl Meteorological Centre thlirlawk danin zaninah Mizoram hmun hrang hrangah ruah tam tak a sur chhunzawm thei.
- 2. Rampum huapa tunlai hmanrua leh thiamna hmanga loneitute puihna tura hmalakna - Viksit Krishi Sankalp Abhiyan chu vawiin khan Mizoram District hrang hrangah hawn a ni.
- 3. Prime Minister Narendra Modia chuan India hmasawннаah hmarchhak chu a bungthar pawimawh tak anih thu a sawi.
- 4. Defence Minister Rajnath Singh-a chuan ramchhunga thilsiam Make-in-India chu ram venhimna kawngah an pawimawh thu a sawi.



WEATHER ALERT

Aizawl Meteorological Centre Director Pu Sudheer Kumar Dwivedi chuan zaninah Mizoram hmun hrang hrangah ruah tam tak a sur chhunzawm thei a ti a,

Akashvani palai zawhna chhangin Pu Dwivedi-a chuan Mamit, Kolasib leh Lawngtlai district-ah te thlir leh ruah a na zual tura an hmuh thu leh district dang zawngah pawh ruah tam tak a sur theih thu a sawi a. Mipuite chu finkhur tura chahin ina awm tam tur leh pawn chhuak tam lo turin a chah a ni.

Pu Dwivedi chuan naktukah Mamit, Kolasib, Saitual leh Khawzawl district ah ruah tam tak sur theia an hmuh thu a sawi bawh a ni.

Byte of Pu Sudheer Kumar Dwivedi

Hemi chungchangah hian District Magistrate te chuan thuchhuah siamin mipuite fimkhur turin an chah a, lei laih lai neite tan, leimin a thlen loh nan hnathawh zawhah uluk taka khuh hul tur a ni a. Tukverh leh kawngkhar nghet taka khar tur a ni a. Mahni ram chhung leimin hlauhawm awm te a ram neitute ten an khuh hul tur a ni a. In chhung rangva thli lak mai theih te thawm that tur a ni.

Thli leh ruah thawh laiin electric khawl zawng zawng OFF vek tur a ni a. Lirthei motor reng reng garage ah him taka 'park' tur a ni a. Mahni in leh lo

chhuahsan tur a ni lo a; inchhungah tawm him tur a ni a, chiai tur a ni lo. Tuihawk luankawr bul hnaiah kal loh tur a ni. Thli leh ruah thawh laiin lui ah leh lui hnaih ah tumah kal loh tur a ni a.

Khuarel chhiatna a lo thlen in mahni bialtu Zonal Officer te hnenah chhiatna thlen thu hriattir tur a ni a, engemaw vanga biak tlang theih loh an nih chuan Link Zonal Officer number tarlang ah te hian report tur a ni.



UNION MOS

Zan khat riaka Mizoram tlawha lo zin Union Minister, Women & Child Development Pi Savitri Thakur chuan vawin khan Zoram Medical College & Hospital tlawhin, Aibawk RD Block-a hnathawh thenkhat a en bawk.

Union Minister hian Mizoram chhunga sawrkar hmalakna hrang hranga tlawmngai pawl - YMA, MHIP, MUP, Kohhran leh midang thawhhona chu ropui a tih hle thu a sawi. Inkawmhona neih zawh hian Zoram Medical College building sak mekte a en a, ZMC chhunga nau awmna Creche tlawh lehin, Ministry of DoNER hnuaia NESIDS (OTRI) Scheme-a thawh 'Residential Hostel' pahnih, Hosteller 82 ve ve awm theihna a tlawh leh a, Hospital chhunga Emergency Department, Obstetrics, Gynaecology Ward, Paediatrics Ward, SNCU leh NICU -te a fang kual bawk.

ZMC a tlawh zawh hnuah Union Minister Pi Savitri Thakur-i chuan Aibawk BDO Office tlawh lehin, Plastic Management Unit, PHE leh RD Department tlanghova an siam chu a tlawh a, tha a tih thu a sawi a. Plastic Management Unit a tlawh zawh hian Aibawk Anganwadi Centre -III tlawh lehin, Anganwadi Centre-a beneficiary-ten an dawn thin - Take Home Ration, Hot Cook Meal leh Saksham Anganwadi & Poshan 2.0 hnuaia Anganwadi Centre tihchangtlunna RO Water filter, LED TV , ECCE kalpui dan leh naupang infiamna hmanraw chi hrang hrangte a en leh a, WCD Mizoram hmalakna tha a ti hle.

Kum 2024-a sak zawh Panchayat Bhawan Aibawk tlawh lehin, PMAY (Gramin) mirethei in sak tanpuina luah luh tawh a en leh a, tha a ti hle bawk a ni. Hemi hnu hian MgNREGA hnuaia kawng siam en lehin, Mizoram chhuahsan turin Lengpui Airport a pan tlang a ni.



MIZO TERRITORIAL ARMY

Mizo Territorial Army dinna tura hmalakna kal mekah an awmna lai tur hmun thlan fel a la ni lova, reiloteah tihfel a nih an beisei tih Coordination & Land Search Committee Chairman Lt. Col. Clement Lalhmingthanga, MLA chuan a sawi.

Pu Clement Lalhmingthanga sawi danin, Mizo Territorial Army awmna tur hian khaw hrang hrangin anmahni khuaa awm tura rawtna sorkarah an thlen a, VC te pawh an inphal viau a, amaherawhchu New Delh-a zin Chief Minister rawn haw hunah a tul anga ngaihtuah zui zel an tum thu leh tun dinhmunah chuan a hmun tur sawichian theih an la nei lo a ti.

Pu Clement Lalhmingthanga chuan recruitment rally an neih hun tur pawh June thla an ruahman naa a la chiang lo a ti a, Mizo Territorial Army recruitment chungchangah a dil thei te graduate nih a ngai tia thu lo tidarh an awm chu a thudik lo a nih thu a sawi a. Hei hi chu India ram pum huapa officer exam tur te tan a nih thu leh an lo hriatpawlh nia a hriat thu a sawi a. Mizo Territorial Army ah chuan pawl 10 chinin an dil theih dawn thu a sawi a ni.

Sorkar laipui atanga phalna an hmuh angin Mizoram sorkar chuan Mizo Territorial Army company pahnih din turin hma a la mek a. Tun thla ni 16 khan Mizoram Sorkar hnuaia Mizo Territorial Army chungchang thil pawimwah hrang hrang ngaihtuah tura din, Coordination & Land Search Committee hmasa ber chu an Chairman Lt. Col. Clement Lalhmingthanga, MLA hovin an thukhawm a. An thutkhawmah hian Territorial Army Company hnih-te temporary a an lo awmna tur, Aizawl leh Lungleiah hmun zawngin ruahmanna siam ni se tiin an rel a. Mizo Territorial Army-ah Mizo thalaite an luh theihna turin ruahmanna hrang hrangte lo kalpui turin Mizoram Youth Commission beisei a nih thu leh a tul angin Sainik Welfare & Resettlement nen hma lo la se tiin an rel bawk a ni.

<><><>

VKSA

Rampum huapa tunlai hmanrua leh thiamna hmanga loneitute puihna tura hmalakna - Viksit Krishi Sankalp Abhiyan (VKSA) chu vawiin khan Mizoram District hrang hrangah hawn a ni a,

Hnahthial leh Lunglei district tan Hnahthial DC pisa kawtah Addl. DC, Pu Zothanmawia Khiangte chuan a hawng a, India ram in tharchhuah ngah mah se hmun, hun leh tha sen ral chhut chuan tharchhuah a tlem hle a ni a ti a. Thawh mila thlai thar chhuah tihtam a nih theih nan tunlai thiamna nen a loneitute ziritirna pek chu campaign thil tum a ni a ti.

VKSA hian Lunglei leh Hnahthial District chhunga khaw 99 te a huam dawn a. He campaign-ah hian Horticulture, Agriculture, AH&Vety, Sericulture leh Fisheries a mithiam te chu Team thum (3)-ah inthenin anni hian thlai chin leh venhim dante bakah ranvultute hnenah zirtirna pein an harsatna sut kian theih dan tur an zirchiang dawn a ni.

Lawngtlai District - tan Chawnhu Multipurpose Community Centre-ah Vikshit Krishi Sankalp Abhiyan (Pre- Kharif Campaign) hi hawn a ni a, Campaign kalpui chhung hian Agriculture leh a kaih hnawih Department ten technology tha leh changtlung tak tak an neihte an puangzar ang.

Serchhip District-ah chuan DC Pu Paul L.Khuma'n a hawng a. Agriculture, Horticulture, Fisheries, AH&Vety, Soil & Water Conservation, Rural Development, Irrigation leh Sericulture Department atangin official te he programme ah hian an tel an tel a. Loneitute hriatna leh thiamna tizau tur te leh an department kaltlanga scheme hrang hrang awm mek te an chhawr tangkai theihna turin thupui thlan bik hmangin heng Department aiawh te hian loneitute zirtirna hun an hmang a ni.

Kolasib ah pawh Kolasib DC Pu Robert C. Lalhmangaihan a hawng a, VKSA hnuaia Campaign turte hi Team pathum ah in then in, Team tin te hian ni khatah khaw pathum zel tlawh in, kuthnathawktute hnenah hlawk zawka

thlai thar dan tur an mamawh ang zelin an zirtir ang. Campaign hi vawiinah tan in, thla thar June ni 12 ah Kolasib District chhunga khaw 60 ah Campaign hi zawh hman tum ani.

Khawzawl ah chuan Zaingen YMA Hall-ah Vikshit Krishi Sankalp Abhiyan (VKSA) hawnna hun hman a ni a, Khawzawl Bawrhsap Pu K. Vanlalthiana'n a hawng a ni.

<><><>

MUHCS

Mizoram Universal Health Care Scheme (MUHCS) hnuaia inziaklut mi 10,514 in he hamthatna hi an hmang tangkai tawh.

Akashvani corr zawhna chhangin Mizoram State Health Care Society CEO Dr Biakthansangi chuan nimin atanga online-a MUHCS in ziahluh theihna an hawn atangin darkar 24 chhungin mi 17 an inziaklut tawh a ti a. Phai lama refer pawh an thahnem tawh hle tih sawiin vawiin thlenga refer tawh zat chu mi 637 an nih thu a sawi.

Dr Biakthansangi chuan April ni 1 atanga damlo inenkawl tawh zawng zawng te bill an pekchhuah tawh zat chu cheng vbc 6 nuai 65 sing 1 sang 7 za 9 35 a nih thu a sawi a. Sorkar hospital-ah mi 9465 in MUHCS hi hmang tawhin heng zinga 8071 chu damdawiin chhuahsan tawh an ni a ti a, 1394 chu enkawl mek an nih thu a sawi a. MUHCS hnuaia nimin thlenga Private hospital inziaklut tawh pakuaah damlo 1049 in MUHCS an hmang tawh a, an zinga 901 chu damdawiin chhuahsan tawh an ni a, 148 chu damdawiina awm mek an ni.

Dr Biakthansangi chuan Health Care Scheme hlui zawk bill an hnenah a la luh reng thu sawiin vawiin thlenga bill ba an la neih zat chu cheng vbc 2 leh nuai 96 a nih thu a sawi a. Hei hi damlo te damdawiin atanga an chhuah hnu leh a then phaiah te kala an haw hnuah an rawn theluh te a ni a, an tihfel thuai dawn thu a sawi a ni.

Mizoram Universal Health Care Scheme ah awlsam takin mahni in lum atanga inziahlul theih reng a nih tawh thu Dr. Biakthansangi chuan a sawi a, mipuite chu inziaklut zel turin a sawm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan India hmasawwnnaah hmarchhak chu a bun thar pawimawh tak anih thu a sawi. Vawiina Sikkima hmasawwnna project hrang hrang a hawwnnaah he thu hi sawiin Prime Minister Modia chuan Sikkim hmasawwnna turin sawrkar laipuiin a pui nasa tih a sawi a. Khawvel khualzinte hipkhawmtu a la ni dawn tih a sawi a. Sawrkar chuan hmasawwnna

khairual a ngai paiwmawh tih sawiin state tinten hmasawnna hna rualkhai takin an dawng zel tawh tih a sawi a ni.

Prime Minister Modia hain vawiin vek khan West Bengal-a Alipurduars district atangin gas semna tur project a hawng bawk a. Cheng vaibelchhe 1017 senna tur he project hian Alipurduar leh Coochbehar district te tan a hlawk dawn hle tih a sawi a. Gas behchhanin India eibar dinhmun chuan hma a sawn tih sawiin Pu Modia chuan hun reiloteah gas bur tel lovin eirawngbawl a theih tawh dawn tih a sawi a. Gas pipeline hmangin in tinah sem a ni tawh dawn tih a sawi bawk a ni.

<><><>

DELEGATES

BJP MP Ravi Shankar Prasad-a kaihhruai All Party Parliamentary delegate-te chuan vawiin khan Rome khawpuiah Italy Foreign Affairs and Defence Committee President Stefania Craxi an hmu a. Firfiaka chetna nuai bo tura rawtna bakah India-in firfiakte a do dan hrang hrangte an sawipui a ni. He team-a tel ve Union Minister hlui MJ Akbar chuan Akashvani zawhna chhangin Pakistan-in kum 1947 atangin firfiakte a chawm tawh tih a sawi a. A damkhawchhuahna hmanrua atan Pakistan chuan firfiakte a hmang tangkai a ni a ti bawk.

<><><>

DEFENCE MINISTER

Defence Minister Rajnath Singh-a chuan ramchhunga thilsiam Make-in-India chu ram venhimna kawngah an pawimawh thu a sawi. Vawiiian CII Annual Business Summit, New Delhi-a neihah he thu hi sawiin Pu Singh-a chuan Operation Sindoorah heng ramchhunga siam ralthuamte hi an tangkai hle tih a sawi a. Pu Singh-a chuan India-in firfiakte dona kawngah kalphung thar siamin ralrel dan tha zawk a siam tih a sawi a. Defence Minister chuan Pakistan nen inbiakna a awm anih chuan firfiakte chungchang leh PoK chungchang chauh a ni ang tih a sawi bawk.

<><><>